


遼史拾遺

三





遼史拾遺

(三)

厲鶚撰

遼史拾遺卷十

本紀第二十一道宗一

道宗孝文皇帝諱洪基字涅鄰小字查刺。

侯延慶退齋閒雅錄曰劉拱衛遠宣和初守祁州嘗接伴北使有李處能者北朝故相李某之子號李狀元家燕人之最以學著者處能謂遠云本朝道宗皇帝好文先人每荷異眷嘗於九日進菊花賦次日賜批答一絕句云昨日吟卿菊花賦剪碎金英作佳句至今襟袖有餘香零落秋風吹不去○錢芳標蕤歎詞話曰遼主得其臣所獻黃菊賦題其後云云元張肯繼孟鑿栝其詞寄蝶戀花曰昨日得卿黃菊賦細翦金英題作多情句冷落西風吹不去袖中猶有餘香度滄海塵生秋日暮玉砌雕闌木葉鳴疏雨江總白頭心更苦素琴猶寫幽蘭譜繼孟手書於卷予嘗見之○書史會要曰遼道宗喜作字嘗有所書秦越大長公主捨棠陰坊第與大昊天寺碑及額今在燕京舊城○晁說之嵩山集曰契丹主洪基以白金數百兩鑄兩佛像銘其背云願後世生中國

改元清寧○冬○十二月○丙申宋遣歐陽修等來賀卽位。

葉夢得石林燕語曰契丹旣修兄弟之好仁宗初隆緒在位於仁宗爲伯故明肅太后臨朝生辰正旦虜皆遣使致書太后本朝亦遣使報之猶娣婦通書於伯母無嫌也至和二年宗眞卒洪基嗣位宗眞

妻臨朝。則仁宗之弟婦也。與隆緒時異。衆議每遣使但致書洪基。使專達禮意。其報亦如之。最爲得體。○歐陽發文忠公事迹曰。至和二年。先公奉使契丹。契丹使其貴臣陳留郡王宗愿。惕隱大王宗熙。北宰相蕭知足。尙父中書令胥王蕭孝友來押宴。曰。此非常例。以卿名重。宗愿。宗熙並契丹皇叔。北宰相。蕃官中最高者。尙父中書令胥王。是皇太后弟。送伴使耶律元寧言。自來不曾如此。一併差近。上親貴大臣押宴。

二年○秋七月。補○八月。

契丹國志曰。秋七月。彗出紫微垣。歷七星。其色白。長丈餘。○又曰。八月朔。日食。

三年春○三月○秋○九月○冬十月。

續資治通鑑長編曰。嘉祐二年春三月乙未。契丹遣林牙左監門衛上將軍耶律防。樞密直學士給事中陳顥。來求聖容。戊戌。右諫議大夫權御史中丞張昇爲回謝契丹使。單州防禦使劉永年副之。初。契丹主宗真。送其畫像及隆緒畫像。凡二軸。求易真宗皇帝及上御容。旣許之。會宗真死。遂寢。至是。契丹遣使再求。故命昇等諭令更持洪基畫像來。卽與之。昇等至虜。果欲先得聖容。昇折之曰。昔文成弟也。弟先面兄。於禮爲順。今南朝乃伯父。當先致恭。虜不能對。以未如其請。夜載巨石塞驛門。衆皆恐。永年擲去之。由是世傳永年有神力。○又曰。秋九月庚子。契丹遣樞密使右金吾衛上將軍蕭扈。宣政殿學士禮部尙書吳湛來。再求御容。且言當致洪基像。冬十月己酉。翰林學士兼侍讀學士工部郎中知制

誥史館修撰胡宿爲回謝契丹使禮賓使李綬副之且許以御容約因賀正使置衣篋中交致焉
四年春正月壬申朔遣使報哀於宋

契丹國志曰祖母法天皇太后蕭氏卒帝遣懷德節度使蕭福延詣宋告哀宋仁宗發哀於內東門幄殿百官進名奉慰輟視朝七日

癸酉宋遣使奉宋主繪像來

邵博聞見後錄曰嘉祐二年秋北虜求仁宗皇帝御容議者慮有厭勝之術帝曰吾待虜厚必不然遣御史中丞張昇遣之虜主盛儀衛親出迎一見驚肅再拜語其下曰眞聖主也

秋○八月補

契丹國志曰秋八月朔日食

五年春○正月補

契丹國志曰春正月朔日食

二月補

東國通鑑曰文宗仁孝王十三年春二月遣告奏使尙書工部員外郎崔奭珍如契丹

六年春○正月補

契丹國志曰春正月大星隕東南有聲如雷

七年。

魏坤倚晴閣雜鈔曰。燕京歸義寺在善果寺西。遼剎也。天王殿前一碑。無撰書人姓氏。額題彌陀邑特建起院碑。文稱寺肇自清寧七年。買徐員外地。遂爲歸義寺。備書寺基牆垣尋尺。以及佛像經藏之數。碑陰首書疏主懺悔師守司徒純慧。大師賜紫沙門守臻。本行僧錄檢校司空精修。大師賜紫沙門智清。次載邑衆姓名。開府儀同三司守太尉兼中書令幽國公劉二玄。開府儀同三司兼侍中開國公趙徽。建雄軍節度使開國公劉需。諫議馬子詮。尙書張挺。中舍李思□。祕書省校書郎劉文。左班殿直韓允。右班殿直王規。燕遼國妃劉蕭氏。遼國夫人杜鄭氏。其餘邑首。邑長。邑正。押司官。印官。副正。副錄。知歷。錢物名號不一。又數十人。

鶻案。道宗加僧守志守司徒。見於咸雍二年。加圓釋。法鈞二僧守司空。見於咸雍六年。觀此碑。知加司徒司空者。先有守臻。智清矣。名器之濫。從可知也。

夏四月。

東國通鑑曰。文宗仁孝王十五年。契丹東京回禮使檢校工部尙書蕭嗽思來。

六月壬子朔。日有食之。

契丹國志曰。六月朔。日食四分。

本紀第二十二道宗二

九年春。○三月辛未。宋主禎殂。

聞見後錄曰。仁宗皇帝崩。遣使訃於契丹。燕境之人。無遠近皆聚哭。虜主執使者手號慟曰。四十二年不識兵革矣。○陳師道後山談叢曰。仁宗崩。訃於契丹。葬而來祭。以黃白羅爲錢。他亦稱是。咸雍元年。○夏四月。

東國通鑑曰。文宗仁孝王十九年夏四月。契丹遣寧遠軍節度使耶律寧。益州管內觀察使丁文通。來加冊王爲守正保義四字功臣。食邑三千戶。食實封二百戶。賜九旒冠。九章服。玉圭。玉冊。象輅。衣。褂。匹段。弓箭。鞍馬等物。又遣利州管內觀察使耶律迪。衛尉卿麻晏。加冊王太子爲兼侍中。加特進。賜九旒冠。九章服。牙笏。竹冊。革輅。衣。褂。匹段。鞍馬。弓箭。酒等物。

二年。

九朝編年備要曰。治平三年。契丹改號大遼。

春。○三月。○壬午。彗星見於西方。

契丹國志曰。春三月。彗見西方。庚申。晨見於室。本大如月。長七尺許。辛巳。昏見於昴。如太白。長丈有五尺。壬午。幸於畢。如月至五日夜。

三年。○夏。○六月。○辛亥。宋以卽位。遣陳襄來報。

陳襄古靈集使還咸熙館道中作詩曰。土曠人稀使驛賒。山中殊不類中華。白沙有露鴛鴦泊。芳草無

情妯娌花氈館夜燈眠漢節石梁秋吹動胡笳歸來攬照看顏色斗覺霜毛兩鬢加。

鶻案宋史藝文志陳襄國信語錄一卷

四年

宇文懋昭大金國志曰太祖武元皇帝呵骨打生於遼咸雍四年戊申初在妊娠時骨重異常將生水爲沸野獸盡嗥及生若有光照其室部落咸異之。

本紀第二十三道宗三

九年○夏四月

契丹國志曰夏四月朔日食

十年春○三月

契丹國志曰春三月遼遣使蕭禧詣宋爭河東地界國書大略言河東路沿邊增修戍壘起鋪舍侵入彼國蔚應朔三州界內乞行毀撤別立界至等事神宗面諭以三州地界俟差官與北朝職官就地頭檢視定奪雄州外羅城今修已十三年即非創築又非近事北朝既不欲如此更不令接續修築白溝館驛亦俟差官檢視如有創蓋樓宇箭窗等並令拆去屯戍兵級並令抽回國書亦云倘事由夙昔固難徇情誠有侵踰何吝改正秋九月遼使蕭索再詣宋議疆事宋遣劉忱呂大忠與之共議於代州遼指蔚應朔三州分水嶺土隴爲界及劉忱與之行視無土隴乃但云以分水嶺爲界凡山皆有分水嶺

相持久之不決。

六月戊辰。親出題試進士。

元好問遺山文集顯武將軍吳君阡表曰。君諱璋。字器玉。姓吳氏。石晉末。有官獻州。從少帝北行者。又自遼陽遷秦州。其子孫遂爲長春人。六世祖匡嗣。遼開府儀同三司。同中書門下平章事。陳國公。五世祖昊。咸雍十年。劉霽榜登科。○蘇軾東坡題跋曰。昔余與北使劉霽會食。霽誦僕詩云。痛飲從今有幾日。西軒月色夜來新。公豈不飲者耶。虜亦喜吾詩。可怪也。○周密癸辛雜識曰。金人天會中。皇子郎君破真定。拘境內進士。立試場。褚承亮。字茂先。宣和中。已擢第。至此匿不出。軍中知其才。遂押付安國寺對策。大抵以徽宗無道。欽宗失信爲問。舉人承風旨。極行詆毀。茂先詣主文劉侍中云。君父之過。豈臣子所宜言耶。卽揖而出。劉爲變色。劉侍中名霽。遼咸雍中狀元。怨宋人海上之盟。故發此問。

太康元年。

直齋書錄解題曰。熙寧正旦國信錄一卷。天章閣待制竇卞熙寧八年使虜所記。

春。○三月。

契丹國志曰。春三月。遼復遣蕭禧齋國書詣宋。以劉忱等遷延爲言。宋命沈括爲報使。詣遼面議。括尋於樞密院閱案牘。得契丹頃歲始議地界書。指古長城爲分界。今所爭乃黃嵬山。相遠三十里。其議遂決。○東都事略曰。熙寧七年。遼遣蕭禧來言。代北對境有侵地。請遣使同分畫。神宗許之。遣太常少卿

劉忱爲使。祕書丞呂大忠爲副。已而大忠丁家難。有詔起復。忱出疆。洪基又遣蕭禧來。時劉忱、呂大忠執不可與。執政知不可奪。乃罷忱。許大忠終制。於是王安石曰。將欲取之。必固與之。以筆畫其地圖。以天章閣待制韓縝奉使。盡舉與之。蓋東西棄地五百餘里。○葉夢得石林詩話曰。元豐初。虜人來議地界。韓丞相縝自樞密院都承旨出分畫。玉汝有愛妾劉氏。將行。劇飲通夕。且作樂府詞留別。翌日。神宗已密知。忽中批步軍司遣兵爲搬家追送之。玉汝初莫測所自。久之。方知其自樂府發也。劉貢父、玉汝姻黨。卽作小詩寄之。以戲云。票姚不復顧家爲。誰謂東山久不歸。卷耳幸容攜婉孌。皇華何啻有光輝。○韓元吉桐陰舊話曰。契丹使每歲至中國。索食料。多不時珍異之物。州縣撓動。莊敏公諱縝。字玉汝。之使虜。入其境稍深。則必索豬肉及胃臟之屬。從者莫能曉。蓋燕北第產羊。俗不畜豬。驛使馳騎。疲於奔命。無日不加箠楚。所以困之爾。旣回程。與送伴者飲。率盡醉。然公翌日乘騎如故。初不病醒也。蓋取隨行大杯酌勸之。伴者不能勝。屢至委頓。臨別痛飲達旦。及敍違。馬上幾不能相揖。後聞虜中責伴者以失儀。沙袋擊之至死。

冬十月。

契丹國志曰。冬十月。彗出軫。

二年。

直齋書錄解題曰。接送伴語錄一卷。集賢校理沈季長熙寧九年接送伴虜使耶律運所記。

三年。

宋史曰。神宗熙寧十年八月。遣蘇頌等賀遼主生辰正旦。○畫墁錄曰。熙寧中。蘇子容使遼。姚麟爲副。曰。盍載些小團茶乎。子容曰。此乃供上之物。疇敢與遼人未幾。有貴公子使遼。廣貯團茶。自爾遼人非團茶不貴也。常以二團易蕃羅一匹。○蔡寬夫詩史曰。韓襄客者。漢南女子。爲歌詩。知名襄。漢閒。孟浩然贈詩曰。只爲陽臺夢裏狂。降來教作神仙客。襄客聞怨詩曰。連理枝前同設誓。丁香樹下共論心。先公熙寧中。遼使成堯錫。見遺衣服。刺此聯於裏肚上。其下復刺丁香連理男女設誓之狀。虜人重此句爲佳製。

四年。○夏。○六月。

契丹國志曰。夏六月朔。日食東南。有大星出。如瓠瓜。聲如雷。其光燭地。

本紀第二十四道宗四

六年。○秋七月。

契丹國志曰。秋七月。彗出太微垣。

八年。

龐元英文昌雜錄曰。元英昨充元豐五年賀北朝正旦國信使。行至神水驛。苦風眩昏亂不記省。隨行小史輩皆環坐以泣。通一昔方稍安。是年正旦。接伴杜刑部紘至深澤縣界中。咯血幾不可救。劉右司

摯充賀同天節接伴沿路病傷寒至滑州增劇然艾數百肩輿以歸後累月方安一歲中奉使者皆得疾危甚殊可怪也。

夏○六月。

契丹國志曰夏六月朔日食陰雲不見。

九年○秋○八月高麗王徽薨○九月○己巳以高麗王徽子三韓國公勳權知國事○冬○十二月○辛卯○高麗三韓國公王勳薨。

東國通鑑曰王勳少有疾居廬哀毀疾益篤十月乙未命母弟國原公連權總國事遺詔傳位是日薨於喪次遣侍御史李資仁如遼告哀資仁至遼帝敕不許入京館詰問二君連逝必有他故合奏實情資仁奏國公夙有疾恙加以哀毀遂至大漸實無他故願留臣等特遣使到本國究問臣若誣罔當服重罪語甚切直帝出御城外氈殿引見慰諭。

十年春正月○丙午復建南京奉福寺浮圖。

朱彝尊曰下舊聞載遼奉福寺佛頂尊勝陀羅尼幢記曰京師奉福寺懺悔主崇祿大夫檢校太尉純慧大師之息化也附靈塔之巽位樹佛頂尊勝陀羅尼幢廣丈有尺門弟子狀師實行以記爲請大師諱非濁字貞照俗姓張氏其先范陽人重熙初禮故守太師兼侍中圓融國師爲師居無何嬰脚疾乃遜匿盤山敷課於白繖蓋每宴坐誦持常有山神敬侍尋克痊八年冬有詔赴闕興宗皇帝賜以紫衣

十八年。敕授上京管內都僧錄。秩滿。授燕京管內左街僧錄。屬鼎駕上仙。驛徵赴闕。今上以師受眷先朝。乃恩加崇祿大夫。檢校太保。次年。加檢校太傅。太尉。師搜訪闕章。聿修睿典。撰往生集二十卷。進呈。上嘉贊久之。親爲帙引。尋命龜次入藏。清寧六年春。鑾輿幸燕。回次花林。師侍坐於殿。面受燕京管內懺悔主菩薩戒師。明年二月。設壇於本寺。懺受之徒。不可勝紀。九年四月。示疾。告終於竹林寺。卽以其年五月。移窆於昌平縣。司空函國公仰司高躅。建立寺塔。并營是幢。庶陵壑有遷。而音塵不泯。清寧九年五月。講僧眞延撰并書。○析津日記曰。廣恩寺。遼之奉福寺也。在白雲觀西南。地名栗園。案遼史。南京有栗園。蕭韓家奴嘗典之。疑卽此地也。

夏四月

高麗史曰。宣宗元年夏四月。遼遣敕祭使益州管內觀察使耶律信。慰問使廣州管內觀察使耶律彥等來。甲戌。祭文宗曰。惟靈。性極禮義之端。體涵中和之粹。王爵馭貴。早襲青社之封。木神則仁。全賦東方之氣。躬懷忠款。以力行。述職貢儀。而歲至。一匡致主。朝廷賴其勳。千里于蕃。生民受其賜。方當拱手以仰成。何意上天之不遺。聞訃悼懷。輟朝增欵。嗚呼。歲陰不留。人生如寄。一千年時運之逢。五十載君臣之義。遽藏夜壑之舟。難祕東園之器。宜顯遣於輶音。俾往申於奠禮。魂兮有知。歆此至意。丁丑。祭順宗曰。惟靈。辰象純精。岳瀆秀氣。慶發世國。才爲王臣。甫從英妙之年。爰被寵嘉之命。撫封日域。述職天朝。翊戴輸誠。開庇底乂。方茂稱藩之績。遽纏陟謁之憂。議以奪情。俾其襲爵。指輶駢之旣駕。聞驛訃之

云來復嗟殲良益用震悼何舟壑之不息乃人琴之俱亡言念忠圖想見風矩臨遣輪馭往陳奠觴冥神有知諒我遐思

大安元年○冬○十一月○丙辰遣使冊三韓國國王勳子運爲高麗國王

東國通鑑曰宣宗思孝王二年冬十一月遼遣保靜軍節度使蕭璋崇祿卿溫嶠等來冊王爲特進檢校太師兼中書令上柱國食邑一萬戶食實封一千戶兼賜冠冕車馬圭印衣帶綵段等物

冬○十一月○戊寅高麗遣使謝封冊

東國通鑑曰宣宗思孝王三年五月遣知中樞院事李子威謝冊命又遣尙書右丞韓瑩告奏時遼欲於鴨綠江將起榷場故請罷之

本紀第二十五道宗五

三年

陸游老學庵筆記曰趙相挺之使虜方盛寒在殿上虜主忽顧挺之耳愕然急呼小胡指示之蓋闔也俄持一小玉合子至合中有藥色正黃塗挺之兩耳周而而去其熱如火旣出殿門主客者揖賀曰大使耳若用藥遲且拆裂缺落甚則全耳皆墮而無血扣其玉合中藥爲何物乃不肯言但云此藥市中亦有之價甚貴方匕直錢數千某輩早朝遇極寒卽塗少許吏卒輩則別有藥以狐溺調塗之亦效

鶚案趙挺之哲宗朝出使遼史失載宋史又無年月因附於此

夏○六月補○秋七月。

契丹國志曰。夏六月有星如瓜。出文昌。○又曰。秋七月朔。日食。陰雲不見。

四年○秋○九月補

東國通鑑曰。宣宗思孝王五年九月。遣太僕少卿金先錫如遼。乞罷鴨綠江榷場。冬十一月。先錫還自遼。回詔曰。屢抗封章。請停榷場。諒惟細故。詎假繁辭。邇議便宜。況未創置。務從安帖。以盡傾輸。釋乃深疑。體予至意。

五年春○三月。

契丹國志曰。春三月。晝有流星出東北。

秋○八月補

陸嘉淑辛齋詩話曰。蘇子由爲賀遼生辰國信使。在元祐四年八月。子瞻有詩送之。既至。國人每問大蘇學士安否。子由經涿州。寄詩曰。誰將家譜到燕都。識底人人問大蘇。莫把聲名動蠻貊。恐防他日臥江湖。子瞻得詩。次韻云。氈毳年來亦甚都。時聞馱舌問三蘇。那知老病渾無用。欲向君王乞鑑湖。聞曩時有刻石於使館者。今無存矣。○胡仔茗溪漁隱叢話曰。蘇子由奉使契丹。寄子瞻詩云。誰將家集過幽都。每被行人問大蘇。莫把文章動蠻貊。恐防談笑臥江湖。澠水燕談錄云。張芸叟奉使大遼。宿幽州館中。有題蘇子瞻老人行於壁間者。聞范陽書肆亦刻子瞻詩數十篇。謂之大蘇集。○岳珂程史曰。承

平時國家與遼歡盟。文禁甚寬。輅客者往來。率以談謔詩文相娛樂。元祐閒。東坡實膺是選。遼史素聞其名。思以奇困之。其國舊有一對曰。三光日月星。凡以數言者。必犯其上一字。於是徧國中無能屬者。首以請於坡。坡唯唯。謂其介曰。我能而君不能。亦非所以全大國之體。四詩風雅頌。天生對也。盍先以此復之。介如言。方共歎愕。坡徐曰。某亦有一對曰。四德元亨利。使睢盱欲起辯。坡曰。而謂我忘其一耶。謹闕而舌。兩朝兄弟邦。卿爲外臣。此固仁祖之廟諱也。使出不意。大駭服。自媿弗及。迄白溝往返。齟舌不敢復言他。○蘇轍樂城集。北使還論北邊事。劄子曰。北朝皇帝年。顏見今六十以來。然舉止輕健。飲唱不衰。在位既久。頗知利害。與朝廷和好年深。蕃漢人戶休養生息。人人安居。不樂戰鬪。加以其孫燕王幼弱。頃年契丹大臣誅殺其父。常有求報之心。故欲依倚漢人。託附本朝。爲自固之計。接伴耶律恭。燕京三司使王經。副留守邢希古。中京度支使鄭顛之流。皆言及和好。咨嗟歎息。以爲自古所未有。又稱道北朝皇帝。所以館待南使之意極厚。有接伴臣等都管一人。未到帳下。除翰林副使。送伴副使。王可。離帳下不數日。除三司副使。皆言緣接伴南使之勞。

六年。

道山清話曰。元祐五年。先公爲契丹賀正使。虜主問范純仁。今在朝否。先公曰。純仁去年六月。以觀文殿學士知穎昌府。又問何故教出外。先公曰。純仁病足不能拜。暫令補外養病耳。又問呂公著如何。外補。先公曰。公著去年卒於位。初不曾外補。乃咨嗟曰。朝廷想見闕人。先公曰。見在召用舊人。先是虜主

聞先公言純仁以足疾外補。乃回顧近立之人微笑。先公既北歸。不敢以是載於語錄。嘗因使殿奏陳。上微語曰。通書說與純仁未幾。先公捐館舍。八年純仁再入相。上首以此告之。

八年春正月。

劉跂暇日記曰。元祐七年。賀正虜使耶律迪卒於滑州。虜人倒懸其尸。出滓穢口鼻中。又以筆管刺皮膚出水。以白礬塗尸令瘦。但令支骨以歸。

九年○冬十月○甲子。宋遣使告其母后曹氏哀。卽遣使弔祭。

畫漫錄曰。元祐末。宣仁聖烈太后上賓。遼人遣使弔祭。回至滑州。死。刳其中央。以頭納孔中。植其足。又取葉數百。披摺徧體。以疏別造轂車。方能行。次年春。予被差報謝入蕃。見其轍路深尺餘。此蕃國貴人禮也。賤者則燔之以歸。耶律之艱尙矣。○又曰。元祐末。宇文昌齡聘契丹。皇城使張環价焉。張頽齡。樞府難其行。環哀請。故事。死於虜。朝廷恩數甚渥。北虜棺銀裝校三百兩。既行。環飲冷食。生無忌。昌齡戒之不納。果病噤。不納粥藥。至十許日。既而三病三愈。竟復命。登對進前。上面哂之。退語近臣曰。張環生還奈何。詣政事堂。諸公大笑。至其家。婦孫睥睨阿翁。剗地又卻來也。○老學庵筆記曰。王聖美子韶。元祐末。以大蓬送北客至瀛。賜宴罷。有振武都頭卒不堪。一行人須索。忽操白刃入斫聖美。其子冒死直前護救。中三刀。左臂幾斷。虞候卒繼至。傷者六人。死者一人。聖美腦及耳皆傷甚。明日不能與虜使相見。告以冒風得疾。虜使戲之曰。曾服花藥石散否。